

Khair Johari meninggal dunia akibat serangan jantung

Um - 20/11/2006

KUALA LUMPUR 19 Nov. - Tan Sri Mohamed Khir Johari (*kiri*), pemimpin veteran UMNO yang juga anggota Kabinet pertama kerajaan pimpinan Almarhum Tunku Abdul Rahman Putra Al-Haj, meninggal dunia akibat serangan jantung di sini hari ini.

Allahyarham yang berusia 83 tahun menghembuskan nafas terakhir sewaktu sedang bersarapan pagi bersama isterinya, Puan Sri Christine Abdullah di kediaman mereka di Kondominium Suasana Central, Brickfields di sini.

Christine berkata, Allahyarham tiba-tiba diserang sesak nafas kira-kira pukul 10.30 pagi ini.

Keluarganya bergegas memanggil ambulans dan anggota perubatan yang tiba kira-kira 10 minit kemudian mengesahkan Mohamed Khir telah meninggal dunia.

Allahyarham yang lebih dikenali dengan panggilan 'Pak Khir' meninggalkan sembilan anak.

Mohamed Khir pernah menjawat beberapa jawatan penting dalam politik termasuk menjadi Setiausaha Agung UMNO.

Beliau dilantik menganggotai Kabinet kerajaan pimpinan Tunku Abdul Rahman sebagai Menteri Pelajaran pertama negara pada tahun 1956.

- Lagi berita, gambar - Muka 4
- Belasungkawa - Muka 10, 32

Selain Mohamed Khir, Kabinet pertama Tunku turut dianggotai oleh Allahyarham Tun Abdul Razak, mendiang Tun H. S. Lee, Allahyarham Sulaiman Abdul Rahman, mendiang Tun V.T. Sambanthan, Allahyarham Tun Sardon Jubir, mendiang Tun Tan Siew Sin, Allahyarham Abdul Aziz Ishak, Allahyarham Tan Sri Bahaman Samsudin, Allahyarham Datuk Abdul Rahman Talib dan Tun Omar Ong Yoke Lin.

Isteri pertamanya, Puan Sri Kelsom @ Che Tom Abdul Rahman yang dikahwininya pada 1943 meninggal dunia pada 20 September 1994 dan Mohamed Khir kemudian mengahwini Christine pada Februari 1996.

Bagi mengenang jasa Allahyarham Mohamed Khir kepada negara, Ketua Setiausaha Negara, Tan Sri Mohamad Sidek Hassan mengumumkan Allahyarham diberi penghormatan terakhir mengikut Istiadat Pengebuan Pembesar Negara di Makam Pahlawan, Masjid Negara di sini.

Hadir memberi penghormatan terakhir di Makam Pahlawan ialah Timbalan Perdana Menteri, Datuk Seri Najib Tun Razak, menteri-menteri Kabinet, tokoh-tokoh politik dan para pemimpin korporat.

Jenazah Mohamed Khir disemadikan pada pukul 7 malam ini.